

Dumonda Danuser (Cuira) concernent la prevenziun d'opiniuns misantropicas en la lavur cun giuvenils

Il resultat d'in studi actual da giuventetgna en Svizra dat en egl: L'ostilitad cunter ils muslims e cunter las personas estras, l'omofobia e l'antisemitissem creschan.

Las enquistas represchentativas da giuvenils – realisada en Svizra tranter ils onns 2022 e 2024 – davart lur stadi da sanadad e davart lur ideas sociopoliticas, mussan in cler svilup areguard opiniuns negativas envers las minoritads:

- La part da las personas interrogadas che approveschan expressiuns ostilas cunter ils muslims è s'augmentada da 6,5 % (2022) a 9,9 % (2024).
- Ina tenuta ostila envers personas estras espriman 25,8 % (2024), entant che l'onn 2022 eran quai mo 15,7 %.
- La quota da giuvenils cun ina tenuta omofoba s'augmenta dad 8,8 % (2022) a 14,6 % (2024).
- A declaraziuns antisemiticas consentan 7,6 % (2024), l'onn 2022 eran quai 5,1 %

Tenutas misantropicas pon esser il terren per in cumportament correspudent. La prevenziun da pregiudizis para perquai dad esser ina incumbensa decisiva, per che questas opiniuns na sa consolideschian betg e na sa midian betg en in cumportament discriminant u schizunt criminal. Sut l'aspect che questas opiniuns èn s'augmentadas cunzunt tar giuvenils pli giuvens e che er giuvenils adina pli giuvens d'aventan criminals (dumber creschent da giuvenils criminals da fin 14 onns), duessan la prevenziun en il sector da la giuventetgna e la lavur cun giuvenils gia vegnir cumenzada baud.

En quest connex s'interessan las sutsegnadras ed ils sutsegnaders per las suandantas dumondas:

1. Tge conclusiuns tira la Regenza dal studi da giuventetgna areguard ils resultats davart il svilup da las ideas sociopoliticas?
2. Datti ord vista da la Regenza in basegn d'agir en connex cun la prevenziun d'opiniuns misantropicas e cun la lavur da giuventetgna?
3. Èsi enconuscent a la Regenza, sche las vischnancas grischunas prestan lavur da prevenziun correspudenta en il sector da la giuventetgna?
4. Nua vesa la Regenza pussaivladads d'agir sin plaun chantunal?

Cuira, ils 30 d'avust 2024

Danuser (Cuira), Luzio, Müller, Atanes, Bachmann, Bardill, Baselgia, Bavier, Beeli, Bergamin, Biert, Bischof, Bisculm Jörg, Bleuler-Jenny, Cahenzli-Philipp (Vaz Sut), Casale, Censi, Cola, Collenberg, Crameri, Das, Dietrich, Furger, Gansner, Gartmann-Albin, Hoch, Holzinger-Loretz, Horrer, Kaiser, Kappeler, Kreiliger, Mazzetta, Messmer-Blumer, Nicolay, Oesch, Pfäffli, Preisig, Rageth, Rettich, Righetti, Rusch Nigg, Rutishauser, Said Bucher, Saratz Cazin, Schneider, Spagnolatti, von Ballmoos, von Wyl, Wieland, Zanetti (Sent), Zanetti (Landquart), Zaugg-Ettlin